

Ite consolu si haere ischidu,  
 Comente unu lircu cantore,  
 Faghene poesias de amore,  
 Bellas, in bantu a s'amoreda mia.  
 Tenzende cussu donu, forsis dia,  
 Resessire a la tenner in su nidu.

Onzi momentu mi punghet s'idea,  
 Cumponner bellas cantones pro te.  
 Tue, però, non bides in me  
 Finesa de un'abile iscrianu.  
 Ma sos joghittos de pizinnu ajanu,  
 Mi faghene cantare, cara Dea.

Cant'ancora pro te, cant'ancora,  
 A boghe lena, muttos de cantone,  
 Cun fantasia e bia passione  
 De sinceru e fidele innamoradu.  
 M'has dae sinu su coro furadu,  
 Tue, Barbara mia, incantsadora.

Ti giomo e ne has cumpassione  
 Nè dolu de su tristu istare meu.  
 Move, a una orta, e in recreu  
 Faghemi cambiare s'angustia.  
 Cherfende tue, cun s'ojada ebbia,  
 Dare des paghe e consolazione.

Però fues e cun odiu miras  
 A mie, chi regiro pro t'amare;  
 Non sentis dolentia a mi lassare  
 Suspirende, arreù, in tant'affogu.  
 Feas, de Orca, miradas de fogu  
 Mi mostras, si appena s'uju giras.

Si mi amas, non sigas su dispettu,  
 Riemi chen'ingannu, a bon'umore.  
 Tra sas rosas, pro me ses su fiore,  
 Pius bellu chi antet su eranu.  
 Fins chi non mi das su cor'in manu,  
 Eo sempre pro te, ist'in'isetu.

## S'IMPIGNU

---

S'impignu dae sa morte non t'hat frantu,  
Cheree ch'addoloridu no mi sie?  
Lassad'has tottu, e finas a mie,  
Ischende chi ti fia caru tantu.

Sos lizzos de sa fossa, in campusantu,  
cun lagrimas infustu happe a tie.  
Sos raios risplendentes de su die,  
In chizzos non m'assutan su piantu.

De sa luna su tantu risplendore,  
In notte chi lontana ch'est sa nue,  
Sa visione tua mi hat pintadu.

M'ingaleno e m'ischido cun dolore,  
Pensende chi mancadu mi ses tue,  
Ait'eo in vida so restadu?

---

Su Pastoreddu

CAMPANA A FESTA

---

Pro Te de su Rimediù Maria  
Sonat toccos a festa sa campana  
De Uthieri, in sa turre isulana  
Tinnit tottu su brunzu de allegria.

Cantas trumbitas e pipiriolos,  
S'intendene sonare, in Cantareddu.  
Divertidi su ezzu, su piseddu  
Godit unu mundu e consolos.

Accò gente accudit a fiottos,  
Istranzos de s'antiga cittadella.  
Pro venerare sa Madonna bella  
Faghen oras d'istrada sos devotos.

Dansadoras briosas de sas biddas,  
Lean parte a su ballu e su costumene.  
Imbidiosas d'achistare lumene,  
Bogan da sutta pes sas ischentiddas.

Cumprin s'impignu, sa promissa insoro,  
In lode de sa Vergine Divina.  
Poi si cale o chie est ballerina,  
curret a sa piatta, a bonu coro.

S'iden'attentos, dae trettu in trettu  
Omines de su soziu abbizzos?  
Pro dare avvertimentos e consizzes  
De osservare ordine e rispettu.

Disvagos e donz'ala e sa cittade  
Agatan sas amigas e amigos,  
Agatan puru sos ballos antigos,  
Cun sonos bellos de variedade.

Però est a primore s'andamentu,  
Non s'intenden muinas de dolore;  
Tottu est risu e giogu, tottu amore  
Durche, unueranu e godimentu.

Est tottue incantu; sas carreras  
Sun pianas d'allegras comitivas,  
Gente de bonà umore, ispansivas  
Pessones de su logu e furisteras.

Sighi campana, allegra non funesta;  
Bastat su dolu, su male passadu.  
Annunzia a su tou populadu  
Chi cuntentu, chent'annos, fattat festa.